

EZ DA AMETSA.

Uso mandatari bat,
 Or, *Bulebarrián*,
 Arkitzen zan urrugaz
 Atzo arratsian,
 Gaubaren erdian,
 Papercho bat gorderik
 Bere egalpian.
 Asi nintzan poliki
 Arrapa nayian,
 Baña uso gaiñoa
 Izutu zanian,
 Egatu zan utzirik
 Papera lurrian,
 Zeña daukatan oraiñ
 Nere esku-artian.
 Ara zer jartzen duen
 Bere barrenian,
 Esanikan erdera
 Euskera gurian:
Bulebar goño ortan
 Musika aditzian,
 Eta gero pozkiro
 Echera joatian,
 Osasun onian,
 ¡Pensazazú daudela
 Asko agonian
 Murzian, Balenzian,
 Españi tristian!
 Au dio, au, paperak
 Tinta beltz-beltzian.
 Ta óraiñ ¿zér egiñ guk

Donosti gurian,
 Erri chit noble, leial,
 Maite, kutunian,
 Karidadeak duen
 Portu ederrian?
 Gure anaiak daude
 Trantze gogorrian:
 Amari iltzen zaio
 Aurra bularrian,
 Bera iltzen da gero,
 Aita ondorian,
 Alaba bazterrian,
 Semia aurrian,
 Familiak dijoaz
 Lurpera batian!...
 ¿Zér egiñ, bada, óraiñ
 Gure Donostian?
 Ez nago ni zueri
 Esan bearrian.
 ¡Anai neréak! zuen
 Biotzen erdian,
 Amorioak dauzka
 Zañak aperian;
 Alá, pena bat nonbait
 Ikusten danian,
 Zañ oek jartzen dute
 Malkoa begian,
 Limosná, sufritzen ¡ai!
 Daudenen tokian,
 Eta orazio bat
 Gurutze-oñian!

ANTONIO ARZÁC.